

共同經課 - 1

創世記二十二章一節~十四節

1 諸個代誌以後，上帝試亞伯拉罕，叫伊講：「亞伯拉罕！」伊應講：「我佇遮。」2 上帝講：「你帶你的子，就是你獨生的子，你所疼的以撒，去摩利亞的地，我所欲指示你的山，佇遐將伊獻做燒祭。」3 亞伯拉罕透早起來，備辦驢，帶伊的二個少年人及伊的子以撒，亦破燒祭的柴，就起身去上帝所指示伊的地。4 到第三日，亞伯拉罕抬目遠遠看彼個所在。5 亞伯拉罕對伊的少年人講：「恁及驢踎遮聽候，我及囡仔去遐敬拜，就倒來恁遮。」6 亞伯拉罕將燒祭的柴下佇伊的子以撒的身上，家己的手抬火及刀；對彼霎二人相及行。」7 以撒給伊的老父亞伯拉罕講：「父啊！」伊講：「我的子，我佇遮。」伊講：「你看，火及柴攏有，總是燒祭的羊仔佇叨落？」8 亞伯拉罕講：「我的子，上帝欲家己備辦燒祭的羊仔。」對彼霎二人相及行。9 in到上帝指示伊的所在，亞伯拉罕佇遐起壇，將柴排好，縛伊的子以撒，下佇壇裡的柴頂。10 亞伯拉罕就伸手抬刀，欲剖伊的子。11 耶和華的使者對天叫伊講：「亞伯拉罕！亞伯拉罕！」伊應講：「我佇遮。」12 使者講：「你毋通佇此個囡仔的身上下手，亦毋通對伊怎樣做。因為我今知你是敬畏上帝；亦無將你的子，就是你獨生者，留啲毋互我。」13 亞伯拉罕抬目看，看見後面有一隻羊牯，角纏佇歸部的樹仔，亞伯拉罕就去掠彼隻羊牯來，獻做燒祭，來替伊的子。14 亞伯拉罕名彼個所在叫「耶和華以勒」，到今仔日人猶啲講：「佇耶和華的山欲備辦。」

共同經課 - 2

詩篇十三篇

1 [大衛的詩，交互樂官。]耶和華啊，你袂記得我欲偌久啊？到永遠嗎？你掩面毋看我欲偌久啊？2 我的心神想來想去，我的心通日憂苦，欲到偌久啊？我的對敵高升贏過我，欲到偌久啊？3 耶和華——我的上帝啊，求你看顧我，聽我！互我的目矚光明，驚了我暈到死；4 驚了我的對敵講：我卡贏伊；驚了我的仇讎佇我搖拙的時來歡喜。5 總是我倚靠你的慈愛；我的心因為你的拯救來快樂。6 我欲唱歌謳唵耶和華，因為伊用大恩款待我。

共同經課 - 3

羅馬書六章十二節~二十三節

12 所以，莫得容允罪惡做王佇恁會死的身軀，致到恁順趁伊的私慾。13 也莫得將恁的百體獻互罪惡做不義的器具；是著將本身獻互上帝，親像對死人中來活者，也獻恁的百體互上帝做義的器具。14 因為罪惡無閣管轄恁，因為恁毋是佇律法下，是佇恩典下。15 按呢就怎樣？咱既然毋是佇律法下，是恩典下，通犯罪嗎？斷斷毋通！16 豈毋知恁獻本身做奴僕來順趁伊，就是做所順趁者的奴僕？或是做罪惡的奴僕，致到死；抑是做順趁的奴僕，致到義？17 感謝上帝！因為恁前做罪惡的奴僕，今曾甘心順趁恁所入彼個教訓的規模。18 已經得著解放脫離罪，就做義的奴僕。19 我因為恁肉體的軟弱，就照人的事來講。因為親像恁曾用恁的百體獻互污穢不法做奴僕，致到不法；今著照按呢用恁的百體獻互義做奴僕，致到成聖。20 因為恁前做罪惡的奴僕，彼時恁無互義管轄。21 當彼時恁得著甚麼果子，佇現今所見誚的啊？因為in的結局是死。22 今恁已經得著解放脫離罪惡，來做上帝的奴僕，得著果子，致到成聖，彼個結局是永活。23 因為罪惡的工錢是死；若是上帝的恩賜是永活，在佇咱的主基督耶穌。

共同經課 - 4

馬太福音十章四十節~四十二節

40 「接納恁的就是接納我；接納我的就是接納差我的。41 為著先知的名來接納先知的，欲得著先知的賞；為著義人的名來接納義人的，欲得著義人的賞。42 見若為著學生的名，干單用一杯冷水互諸個細子的一個飲的，我實在給恁講，伊決斷袂失落伊的賞。」